

采芳隨筆卷二

北平查彬伯埜輯

梅花神品也始見於炎帝之經號曰花魁一號癯仙曾端伯取友於十花呼梅花為清友張敏叔景脩十二客圖呼為清客孤山處士稱之曰妻山谷先生尊之曰兄放翁以為花中巢許袁豐以為世外佳人劉行簡以為花御史姚明山涑以為洪崖仙尉潛確類書以為有四德四貴宋張功甫鉉以為天下神奇為列花宜稱二十六條為淡雲為曉日為薄寒為細雨為輕煙為佳月為夕陽為微雪為晚霞為珍禽為孤鶴為清溪為小橋為竹

邊為松下為明窻為疏籬為蒼厓為綠苔為銅瓶為紙
帳為林間吹笛為膝上橫琴為石枰下碁為掃雪煎茶
為美人淡粧簪戴又列花榮寵六條為煙塵不染為鈴
索護持為除地徑淨落瓣不溜為王公旦夕留盼為詩
人閣筆評量為妙妓淡粧雅歌植梅三百本築堂數間
曰玉照其種有江梅嶺梅野梅官梅之分純綠者為綠
萼華白者為玉蝶梅西京雜記有侯梅紫花梅同心梅
朱梅臘貼梅麗友梅紫蒂梅海墨徽言有綠英梅雲間
郡志有西施梅照水梅元稹時有九英梅花鏡有鴛鴦
梅雙頭紅梅單瓣紅梅杏梅品字梅麗枝梅臺閣梅范

石湖成大玉雪坡有梅數百本作譜九十種以為天下
尤物云以韻勝以格高以橫斜踈瘦與老枝奇怪者為
貴有直脚梅早梅官城梅古梅成都謂之梅龍重葉梅百葉緗
梅一名黃香梅一紅梅繁密如杏千葉紅梅鶴頂梅曲洧舊
聞有椒萼梅廣客談有孝梅具區志有吐花酸脆梅一名
梅裏羣芳譜又載有消梅時梅冬梅墨梅冰梅重葉梅
等種粵西有梅瘴風俗通五月有落梅風風土記夏至
雨名黃梅雨趙必連有梅花莊王冕有梅花屋梅子曰
乾蓀一名乾腊含之香口一名雪華又名含酸其制作
則有梅花湯餅蜜漬梅花湯綻梅梅粥梅花脯梅花紙

帳梅花油梅籃梅杖壽陽公主有梅花粧會稽山有梅
 樑餘又有梅嶺梅溪梅巖梅亭梅花塢梅隱等名梁元
 帝詩云梅含今春樹還臨先日池人懷前歲意花發故
 年枝周庾子山信詩云常年臘月半已覺梅花闌不信
 今春晚俱來雪裏看樹凍懸冰落枝高出手寒早知覓
 不見真愧著衣單陳陰鏗詩云春近寒雖轉梅舒雪尚
 飄從風還共落照日不俱銷葉開隨足影花多助重條
 今來漸異昨向晚判勝朝唐楊炯梅花落云窗外一株
 梅寒花五出開影隨朝日遠香逐便風來泣對銅鈎障
 愁看玉鏡臺行人斷消息春恨幾徘徊王適詩云忽見

寒梅樹開花漢水濱不知春色早疑是弄珠人李嶠詩
云大庾斂寒光南枝獨早芳雪含朝暝色風引去來香
粧面迴青鏡歌塵起畫梁若能逢止渴何暇泛瓊漿孫
逖詠後庭梅云聞唱梅花落江南春意深更傳千里外
來入越人吟弱幹紅粧倚繁香翠羽尋庭中自公日歌
舞向芳陰梅院重開掩遙遙歌吹邊庭深人不見春至
曲能傳花落彈碁處香來薦枕前使君停五馬行樂此
中偏杜少陵甫詩云東閣官梅動詩興還如何遜在揚
州此時對雪遙相憶送客逢春可自由幸不折來傷歲
暮若為看去亂鄉愁江邊一樹垂垂發朝夕催人自白

頭又詩云梅蕊臘前破梅花年後多絕知春意早最奈
客愁何雪樹元同色江風亦自波故園不可見巫岫鬱
嵯峨錢起詩云莫言山路僻還被好風催行客淒涼過
村籬冷落開晚溪寒水照晴日數蜂來重憶江南酒何
因把一杯韓昌黎春雪間早梅云梅將雪共春彩豔不
相因逐吹能爭密排枝巧妬新誰令香滿座獨使淨無
塵芳意饒呈瑞寒光助照人玲瓏開已遍點綴坐來頻
那是俱疑似須知兩逼真熒煌初亂眼浩蕩忽迷神未
許瓊華比從將玉樹親先期迎獻歲更伴占茲辰願得
長輝映輕微敢自珍張籍詩云自愛新梅好行尋一徑

斜不教人掃石恐損落來花戎昱早梅詩云一樹寒梅
白玉條迴臨村路傍溪橋不知近水花先發疑是經春
雪未消王初春日詠梅花云青帝來時值遠芳殘花殘
雪尚交光隔年擬待春消息得見春風已斷腸應為陽
春信未傳故將青豔屬殘年東君欲待尋佳約剩寄衣
香與粉綿鄭述誠華林園早梅云曉日東樓路林端見
早梅獨凌寒氣發不逐衆花開素彩風前豔韶光雪後
催蕊香露紫陌柳亞拂春苔止渴曾為用和羹舊有才
含情欲攀折路望幾徘徊杜牧之詩云輕盈照溪水掩
歛下瑤臺妬雪聊相比欺春不逐來偶同佳客見似為

凍醪開若在秦樓畔堪為弄玉媒李義山商隱詩云知
訪寒梅過野塘久留金勒為迴腸謝郎衣袖初翻雪荀
令熏爐更換香何處拂胸資蝶粉幾時塗額藉蜂黃維
摩一室雖多病亦要天花作道場皮襲美日休句云共
月已為迷眼伴與春先作斷腸媒鄭谷詩云江梅且緩
飛前輩有歌詞莫惜黃金縷難忘白雪枝吟看歸不得
醉嗅立如癡和雨和煙折含情寄所思羅江東隱句云
愁憐粉豔飄歌席靜愛寒香撲酒尊崔櫓詩云含情含
態一枝枝斜壓漁家短短籬惹袖尚憐香半日向人如
訴雨多時初開偏稱雕梁畫未落先愁玉笛吹行客見

來無去意解帆煙浦為題詩又有白云強半瘦因前夜
雪數枝愁向晚來天韋莊詩云滿街芳草卓香車仙子
門前白日斜腸斷東風各回首一枝春雪凍梅花崔道
融詩云數萼初含雪孤標畫本難香中別有韻清極不
知寒橫笛和愁聽斜枝倚病看朔風如解意容易莫摧
殘又詩云憶得去年有遺恨花前未醉到無花清芳一
夜月通白先脫寒衣送酒家韓偓句云玉為通體依稀
見香號返魂容易回李九齡句云留得和羹滋味在任
他風雪苦相欺釋熊皎詩云江南近臘時已亞雪中枝
一夜欲開盡百花猶未知人情皆共惜天意不教遲莫

訝無濃豔芳筵正好吹釋齊己詩云萬木凍欲折孤根
暖獨回前村深雪裡昨夜一枝開風送幽香出禽窺素
豔來明年如應律先發映春臺宋王沂公曾句云而今
未問和羹事且向百花頭上開王珪詩云冷香疑到骨
瓊艷幾堪餐半醉臨風折清吟拂曉觀贈春無限意和
雪不知寒桃李有慙色枯枝並託欄范文正公詩云蕭
條臘後復春前雪壓霜欺未放妍昨日倚欄枝上看似
留芳意入新年趙清獻詩云素萼清香並酒卮主人勤
意囑留詩為逢蜀國新開日却憶江南舊賞時春早未
通桃李信臘殘都放雪霜姿先公舊植亭欄外肯構從

來見本枝蔡忠惠襄十一月後庭梅花盛開云迎臘梅
花無數開旋看飛片點青苔幽香粉豔誰人見時有山
禽入樹來日暖香繁已盛開開時曾遶百千迴春風豈
是多情思相伴花前去又來梅聖俞和正仲重臺梅花
云芳梅何萋萋素葉吐層層近臘寒猶勁先春氣已承
冷香傳去遠淨豔密還增有意常欺雪無功合鏤冰早
煙籠玉暖凍雨浴脂凝漢女新粧薄燕姬瘦骨稜壓枝
惟恐折簇萼似難勝神物終來護江鄉未解衿獨竒心
豈欲寄遠客何曾不見黃鸝度寧防粉蝶凌月光臨更
好溪水照偏能畫軸開雲霧宮刀剪綵繒都無筆可銜

莫信巧堪憑丹杏塵多雜夭桃俗所稱故林嘗渴望大
庾更愁登重和陽春曲聲辭猥媿仍林和靖逋詩云衆
芳搖落獨暄妍占盡風情向小園踈影橫斜水清淺暗
香浮動月黃昏霜禽欲下先偷眼粉蝶如知合斷魂幸
有微吟可相狎不須檀板共金樽又詩云剪綃零碎點
酥乾向背稀稠畫亦難日薄縱甘春至晚霜深應怯夜
來寒澄鮮祇共鄰僧惜冷落猶嫌俗客看憶著江南舊
行路酒旗斜拂墮吟鞍又詩云吟懷長恨負芳時為見
梅花輒入詩雪後園林纔半樹水邊籬落忽橫枝人憺
紅豔多應俗天與清香似有私堪笑胡雛亦風味解將

別調角中吹又詩云小園煙景正淒迷陣陣寒香壓麝
臍池水倒窺疎影動屋簷斜入一枝低畫名空向閑時
看詩俗休徵故事題慙愧黃鸝與蝴蝶祇知春色在桃
溪孤根何事在柴荆村色仍將臘候并橫隔片煙爭向
靜半黏殘雪不勝清等閒題詠誰為愧子細相看似有
情搔首壽陽千載後可堪青草雜芳英王半山安石詩
云漢宮嬌額半塗黃粉色凌寒透薄粧好借月魂來映
燭恐隨春夢去飛揚風亭把盞酬孤豔雪徑回輿認暗
香不為調羹應結子直須留此占年芳結子非貪鼎鼎
嘗偶先紅杏占年芳從教臘雪埋藏骨却怕春風漏泄

香不御鉛華知國色祇裁雲縷想仙裳少陵為爾牽詩
興可是無心賦海棠淺淺池塘短短牆年年為爾惜流
芳向人自有無言意傾國天教抵死香鬚裊黃金危欲
墮帶團紅蠟巧能裊嬋娟一種如冰雪依倚春風笑野
棠又詩云牆角數枝梅凌寒獨自開遙知不是雪為有
暗香來東坡詩云春風嶺上淮南村昔年梅花曾斷魂
豈知流落復相見蠻風蜚雨愁黃昏長條半落荔枝浦
卧樹獨秀桄榔園豈惟幽光留夜色直恐冷豔排冬溫
松風亭下荊棘裏兩株玉蕊明朝暎海南仙雲嬌墮砌
月下縞衣來扣門酒醒夢覺起繞樹妙意有在終無言

先生獨飲勿歎息幸有落月窺清樽又再用前韻云羅
浮山下梅花村玉雪為骨冰為魂紛紛初疑月挂樹耿
耿獨與參橫昏先生索居江海上悄如病鶴棲荒園天
香國豔肯相顧知我酒熟詩情溫蓬萊宮中花鳥使綠
衣倒挂扶桑暎抱叢窺我方醉卧故遣啄木先敲門麻
姑過君急灑掃烏能歌舞花能言酒醒人散山寂寂惟
有落蕊粘空樽又和秦太虛詩云西湖處士骨應槁只
有此詩君壓倒東坡先生心已灰為愛君詩被花惱多
情立馬待黃昏殘雪消遲月出早江頭千樹春欲暗竹
外一枝斜更好孤山山下醉眠處點綴裊腰紛不掃萬

里春隨逐客來十年花送佳人老去年花開我已病今
年對花還草草不如風雨卷春歸收拾餘香還畀吳又
再和潛師云化工未議蘇羣槁先向寒梅一傾倒江南
無雪春瘴生為散冰花除熱惱風清月落無人見洗粧
自趁霜鐘早惟有飛來雙白鷺玉羽瓊枝鬪清好吳山
道人心似水眼淨塵空無可掃故將妙語寄多情橫機
欲試東坡老東坡習氣除未盡時復長篇書小草且撼
長條餐落英忍饑未忍窮呼吳又次韻陳四雪中賞梅
云臘酒詩催熟寒梅雪鬪新杜陵休歎老韋曲已先春
獨秀驚凡目遺英卧逸民高歌對三白遲暮慰安仁又